

Vun driweriwer

erscheint auf www.lenauheim.de

monatliche
Erscheinung

Juli 2012

von *Helen Alba*

Ihre Welt is mit Bretter zugenaelt - Bogaroscher han ke Ahnung vun Johann Szimits

Frohgemut sin mer morjets geger Bogarosch losgfahr. Ich han mer in de Kopp gsetzt, mol nohzuforsche, ob des Haus, in dem wu vor 160 Jahr de Johann Szimits gebor is, noch steht. Un ob die alde Leit, die wu heit noch im Ort lewe, etwas iwer unser Heimat- un Schwowedichter wisse, ob se sei Gedichter kenne. Also je nin in die Gass, ich such es Haus mit der Nummer 523 un war iwerrascht: scheen geel geweißelt mit braunem Sockel, gut iinstandghal. Do soll Johann Szimits am 5. Juli 1852 uf die Welt kumm sin. E „Hallo“ am Teertl, e Hund fangt zu belle an un e Mann kummt raus. Leider kann er ke Antwort gin uf mei Froch, wem des Haus frieher gheert hat un ruft sei Weib. Derbei handelt es sich um die Familie Maria un Gheorge Ardelean, die seider 20 Jahr des Haus bewohne. Sie wisse nor sovill, dass se des Haus vum Vetter Martin Jung, der was uf Deitschland ausgewannert is, kauft han, un dass de Vetter Martin es Haus nei verputzt un die Johrzahl drufgschrieb hat. Dass do mol e Johann Szimits gelebt hat, des war de Leit unbekannt.

Vun wu kummt de Name her?

Naja, denk ich im Stille, es sin Rumäner, was wisse die vun schwowische Szimits-Gedichter? Un geh guter Dinger weiter in e anri Gass. Zum Vetter Juri Maglowski. Erschter weess ich gar nimi, wu der Mann wohnt, froo sicherheitshalwer e Weib, des wu uf der Gass steht. Un steh vor eem baufällliche Haus, de Lattezaun hat meh Lecher wie Latte un treff de Vetter Juri an. De Hof is verwarlost, in der Summerkich e Männerwertschaft. Wie ich froo, ob er schun mol vum Johann Szimits gheert, oder etwas gelest hat, beidelt er nor de Kopp: „Wer is des? Ich han doch die Bogaroscher alli gekennt, doch vun eem Szimits nie etwas gheert!“ Er is 81 Jahr alt, noch ziemlich fit un ich sin neugierich, vun wu sei Name herkommt. „Des kann ich der nit saan, vielleicht ware mei Vorfahre Pole? Hat mich nie intressiert!“

„Mir Schwowe han uns immer selwer dorchgschlaa!“

Aus Erfahrung weess ich, dass ich de Meiniger Nicki um die Uhrzeit im Wertshaus antreff. E Stampl, oder gleich zwaa vorm Mittachesse, des is sei tägliche Porzion. Er sitzt aa dort, mutterseeleleeneich an eem Tisch un schaut trieb in sei Rakiglas. Wie er mich gsieht, strahlt sei Gsicht, weil er ment, dass ich em als ehemals Russlandverschleppter wieder was mitbring. Ich han ne entteische misse: „Nicki, heit sin ich for was anres do. Bei uns in Bogarosch, do is vor villi Jahr e Dichter, de Johann Szimits, gebor gin. Hascht des gewisst?“ „Meiner Seel, nee. Noch nie was derfun gheert. Intressiert mich a wenich“!

Beim Weitergehn erinner ich mich dran, wie vor phaar Jahr unser Landsmann Jakob Laub, der was selmols noch Bundesvorsitzender der Landsmannschaft war, Bogarosch bsucht un de Leit angetraa hat, ach in seim Heimatort e Sozialstation mit Esse uf Räder inzurichte. De Nicki hat domols behaupt: „Mir Schwowe han uns immer selwer dorchgschlaa! Mir breiche Eier Kich mit oder ohne Räder uf ke Fall!“ Un jetzer is er e Sozialfall, hat ke niemande me un geht jede Tach gratis sei Mittachesse ins Kinerheim holle.

Ohne Radio, Zeitung oder Fernseher

In Gedanke versunk bie ich in die Werschitzer Gass in un mach bei der Bäsl Klari Baba Halt. Sie feiert in dem Summer ihre 80. Geburtstach, ich kenn se gut aus meiner Kinerzeit, sie war unser Nochberin iwer die Gass. Jetz kann se bal gar nimi gehn, sie un ihre Vetter Niklos han sich junge Leit iwergin, die was se betreije. „Bäsl Klari, ich sin frooe kumm, ob eich de Johann Szimits, der was bei uns in Bogarosch uf die Welt kumm is, bekannt is un ob der sei Gedichter kennt?“ „For was soll ich dich anlieje mei Kind? Vun eem Szimits han ich in meim Lewe noch nie was gheert“! „Was macht der dann de ganze Tach? Tut der Radio horche, lese oder Fernseh schau“? „Gar nix mache mer. Do hucke mer in der Summerkich un gehn um zehn Uhr nuf schlofe“. „Nitemol die deitschi Sendung beim Radio Temeschwar tut der horche?“ „Wuher dann, mir schalle es Radio nitemol in“! „Seid der dann nit neugierich, was so im Land, in der Welt gschieht“? „Nee, mei Kind. Mir sin alt un verstehn doch nix dervun“!